


Ni Presidente  
Thomas S. Monson



# Dagiti Bendision ti Panagtungpal

**T**i kadadaklan a leksion nga maadaltayo iti mortalidad,” nga insuro ni Presidente Thomas S. Monson, “ket no agsao ti Dios ken tungpalentayo, kanayon nga umisotayo.”<sup>1</sup>

Ken mabendisionantayo pay. Kas naibaga ni Presidente Monson itay napalabas a sapasap a komperensia: “No kupikopantayo dagiti bilin, naragragsak dagiti biagtayo, ad-adda a makapnek, ken saan a narikut. Dagiti pannubok ken parikuttayo ket nalaklaka nga ibturan, ken maawattayo dagiti inkari ti [Dios] a bendision.”<sup>2</sup>

Iti sumaganad nga naadaw manipud kadagiti pannursuro ni Presidente Monson a kas Presidente ti simbaan, ipalagipna kadatayo a ti panagtungpal kadagiti bilin ket isuda ti kasisiguraduan a mangidalan iti kinaragsak ken kappia.

## Dagiti pangidalan iti Panagdaliasat

Dagiti bilin ti Dios ket saan nga naited tapno mangupay kadatayo wenno agbalin a lapped iti ragsaktayo. Idinto a ti kasunganina ket pudno. Isuna a nangparsua kadatayo ken mangay-ayat unay kadatayo ket ammona no kasano a kasapulan nga ibiagtayo a naurnos dagiti biagtayo tapno posible a magun-od ti naindaklan a kinaragsak. Inyaramidannatayo kadagiti annuroten tapno, no surotentayo ida, makitanatayo a sitatalged a makaungpot iti dayta masansan a manangliliput a panagdaliasat. Malagiptayo dagiti balikas ti nalatak a himno: “Tungpalen dagiti bilin! Ditoy adda kinatalged;

ditoy adda kappia’ [kitaen iti “Keep the Commandments,” *Hymns*, no. 303].”<sup>3</sup>

## Kinapigsa ken Pannakaammo

Ti panagtungpal ket maysa a gagangay a kababalin dagiti propeta; daytoy ti nangted kadakuada iti pigsa ken pannakaammo iti amin a panawen. Napateg unay daytoy tapno maamiristayo a maikaritayo met iti daytoy a pagtaudan ti pigsa ken pannakaammo. Sidadaan a magun-od daytoy ti tunggal maysa kadatayo ita no agtungpaltayo kadagiti bilin ti Dios. . . .

Ti pannakaammo a sapsapulentayo, dagiti sungbat a paggagarantayo, ken ti pigsa a tartarigagayantayo ita a sumango kadagiti karit ti nariribuk ken agbaliw-baliw a lubong ket matagikuatayo no sitatallugodtayo nga agtungpal kadagiti bilin ti Apo.”<sup>4</sup>

## Pilien ti Agtulnog

“Ti kadawyanen kadagiti panawentayo ket ti iyaanamong. Dagiti pabuya kadagiti magasin ken television ket iladawanda dagiti bituen iti pelikula, dagiti bannuar iti tay-ak ti athletics- dagitoy nabayagen a pagraraeman dagiti agtutubo- a di mangikankano kadagiti paglintegan ti Dios ken dagiti mangsupring ken napnuan basol nga aramid, kasla awanandan iti dakes nga epekto. Patienyo kadi? Adda tiempo ti panagkuenta- ken panangbalanse iti libro. Tunggal Cinderella ket addaan iti tenggat-rabii, no saan nga ita a biag, iti sumaruno. Sumangbay iti amin ti

Aldaw ti Panagukom. . . . Ipakaasik kadakayo ti panangpi-liyo ti agtulnog.”<sup>5</sup>

### Rag-o ken Kappia

Mabalin a no dadduma iti panagkitayo a naragragsak nga amang ngem dakayo dagiti adda iti lubong. Mabalin a marikna ti sumagmamano kadakayo a maig-igetankayo maipapan iti pagrukodan ti ugali a sursurotentayo iti Simbaan. Nupay kasta, kakabsatko, ibagak kadakayo, nga awanen ti *sabali pay* a makaisangbay iti ad-adu pay a rag-o kadagiti biagtayo wenno ad-adu pay a kappia kadagiti kararuatayo ngem ti Espiritu a makaumay kadatayo bayat iti panangsurottayo iti Mangisalak ken mangkupi-kop kadagiti bilin.”<sup>6</sup>

### Magna a Nalinteg

“Paneknekak kadakayo a dagiti naikari a bendision ket aglaplapunosan. Uray agummong dagiti ulep ti bagyo, uray maibuyat dagiti tudo kadatayo, ti pannakaamotayo iti ebanghelio ken ti ayattayo iti Nailangitan nga Ama ken ti Mannubbottayo ti mangliwliwa ken mangsustener kadatayo ken mangidanun iti rag-o kadagiti pusotayo iti pannag-natayo a sililinteg ken agtungpal kadagiti bilin. Awan ti aniaman ditoy lubong ti mangparmek kadatayo.”<sup>7</sup>

### Surotenyo ti Mangisalak

“Asino daytoy maysa a Tao ti ladingit, ken napagsagaba?” “Siasino ti Ari ti gloria, daytoy nga Apo dagiti apo? Isu ti Maestrotayo. Isu ti Mangisalakantayo. Isu ti Anak ti Dios. Isu ti Akin-aramid iti Pannakaisalakantayo. Agay-ayab, ‘Umaykay sumurot kaniak.’ Imbilinna, ‘Inkan, ket aramidem met ti kasta.’ Impakaasina, ‘Tungpalenyo dagiti bilbilinko.’

“Surotentayo koma Isuna. Tuladentayo koma ti pagwaddanna. Tungpalentayo koma dagiti balikasna. Babaen ti panangaramid iti kastoy, maitedentayo Kenkuana ti nadiosan a sagut ti panagyaman.”<sup>8</sup>

### DAGITI NAGADAWAN

1. “They Marked the Path to Follow.” *Liahona*, Okt. 2007, 5.
2. “Keep the Commandments,” *Liahona*, Nob. 2015, 83.
3. “Keep the Commandments,” 83.
4. “Obedience Brings Blessings,” *Liahona*, Mayo 2013, 90, 92.
5. “Believe, Obey, and Endure,” *Liahona*, Mayo 2012, 129.
6. “Stand in Holy Places,” *Liahona*, Nob. 2011, 83.
7. “Be of Good Cheer,” *Liahona*, Mayo 2009, 92.
8. “Finding Joy in the Journey,” *Liahona*, Nob. 2008, 88.

## PANANGISURO MANIPUD ITI DAYTOY A MENSAHE

Isuro ni Presidente Monson kadatayo maipanggep kadagiti adu a bendision a maawattayo iti panagtulnog, pakairamanan ti kired, pannakaammo, rag-o ken kappia. Iramanyo a saludsuden dagiti sursuruanyo no kasano a nabendisionanda bayat iti panagtulnoda kadagiti bilin. Mapaturedyo ida nga agtultuloy a mangutob kadagiti bendisionanda ket isuratda iti journal dagiti kapanunotan ken kapadasanda. Mapaturedyo pay ida a mangipakita iti panagyaman iti Dios kadagiti bendision babaen iti panagtultuloy a managtungpal.

## AGTUTUBO

### Dagiti Apoy ken Adalen ti Panagtungpal

**N**aminsan a naibaga ni Presidente Thomas S. Monson maipanggep daydi tiempo nga naadalna ti kinapateg ti panagtungpal. Idi agtawen iti walo, binisita ti pamiliana ti cabinda iti kabanbantayan. Kayatna ken ti gayyemna ti mangdalus iti maysa a naruot a lugar para iti campfire. Pinadasda a dalusan ti karuotan babaen ti imada, nagguyod ken naggabut iti kasta unay inggat kabalinanda, ngem ti laeng naalada ket dagiti sangkapetpet a ruruot. Inlawlawag ni Presidente Monson, “Ket kalpasanna dimteng ti walo-ti-tawen a panunotko ti impagarupko a kapintasan a solusion. Kinunak ken ni Danny, “Kasapulanta laeng a puoran dagitoy a ruot. Inta laeng *puoran* ti tengnga ti karuotan!”

Uray ammona a di mapalubosan nga agusar iti gurabis, nagtaray a nagsubli iti cabin ket nangala iti sumagmamano, ket nangsilmutda ken Danny iti bassit a paset ti karuotan. Impagarupda a maiddepto lattan, ngem saan ta dimmakel a nagramram ken makadadadel nga apoy. Napanda ken ni Danny nagpatulong, ket madamdama addan dagiti nataengan a nangiddep iti apoy sakbay a nakadanun kadagiti kayakoy.

Intuloy ni Presidente Monson, “Nasursuromi ken ni Danny ti sumagmamano a narigat ngem napapateg a leksion iti dayta nga aldaw—ti dakkal a paset daytoy ket ti kinapateg ti panagtungpal.” (Kitaen iti “Obedience Brings Blessings,” *Liahona*, Mayo 2013, 89-90.)

Kas ken ni Presidente Monson, adda kadin naadalyo a leksion babaen iti narigat a wagas maipanggep iti panagtulnog? Ania dagiti kayat a tun-oyen ti aramidem tapno iti masakbayan ket mapagbalinmo ti bagim a natalged?

## Pilien ti Rumbeng

**T**i panagpili ti rumbeng ket iyasidegnatayo iti Nailangngitan nga Ama ken ni Jesucristo. Tulungannatayo pay nga agbalin a naragsak ken natalged. Timbukelan dagiti wagas tapno piliem ti rumbeng.

Agulbod sadiay iskuwela.

Basaenyo dagiti nasantuan a kasuratan.

Mapan iti simbaan.

Agay-ayam kadagiti napipintas a games.

Makikabil kadagiti kakabsat.

Agserbika kadagiti dadduma.

© 2016 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/16. Pannakaanamongna a maipatarus: 6/16. Pannakaipatarus ti *First Presidency Message, October 2016*. Ilokano. 12870 864



Pammati, Pamilia, Tulong

# Inordenan ti Dios ti Kaamaan

*Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawat iti “Ti Pamilia: Maysa a Waragawag iti Lubong” papigsaenna ti pammatiyo iti Dios ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti [reliefsociety.lds.org](http://reliefsociety.lds.org).*

“Kadagiti balikas [iti Primary Song], ‘The Family is of God,’ . . . maipalagip kadaytoy ti natarnaw a doktrina,” kinuna ni Carole M. Stephens, umuna a mammagbaga iti Relief Society General Presidency. “Saan laeng a maadaltayo a ti pamilia ket ikut ti Dios ngem ketdi maadaltayo pay a tunggal maysa kadaytoy ket paset ti pamilia ti Dios. . . .

“ . . . Ti plano ti Ama para kadagiti anakna ket plano ti ayat. Daytoy ket plano a mamagtitipon kadagiti Annakna—Ti Pamiliana—Kenkuana.”<sup>1</sup>

Ni Elder L. Tom Perry (1922-2015) iti Korum dagiti Sangapulo-ket-dua nga Apostol kinunana: “Mamatitayo pay a dagiti nakikired a tradisional a pamilia ket saanda laeng a dagiti umuna a paset ti natalged a sosiedad, natalged nga ekonomia, ken natalged a kultura dagiti values-ngem ketdi isuda pay dagiti umuna paset iti awan patinggana ken iti pagarian ken gobierno ti Dios.

“Mamatitayo a ti gunglo ken gobierno ti langit ket maipasdekto iti ikub dagiti pamilia ken dagiti extended a pamilia.”<sup>2</sup>

“Tunggal maysa, ania man ti kasasaadda iti panagasawa wenno bilang dagiti annak, ket makapagbalin a salaknib iti plano ti Apo a nailadawan iti waragawag ti kaamaan.” kinuna ni Bonnie L. Oscarson, Young Women General President, “No plano ti Apo daytoy, nasken a daytoy met ti agbalin a planotayo”<sup>3</sup>

## **Dagiti Mainayon a Nasantuan a Kasuratan**

Doktrina ken Katulagan 2:1-3; 132:19

### **Ti Doktrina ti Pamilia**

Ni Sister Julie B. Beck, dati a Relief Society General President, insurona a ti theology ti pamilia ket naibasar iti Pannakaparsua, ti Pannakatnag, ken ti Pannubbot ni Jesucristo:

“Ti Pannakaparsua ti lubong ket nangted iti lugar a sadiay ket makapagbiag dagiti pamilia. Pinarsua ti Dios ti lalaki ken babai nga isuda dagiti dua a napapateg a mangbukel iti pamilia. Paset daytoy ti plano ti Nailangitan nga Ama a da Adan ken Eba ket aglantip ken mangbuangay iti agnanayon a pamilia.

“ . . . Ti Pannakatnag ti namagbalin kadakuada a maaddaan iti annak a babbai ken lallaki.

“Ti Pannubbot [ni Cristo] ket ipalubosna a mailantip ti pamilia iti agnanayon. Ipalubosna dagiti pamilia a maaddaan iti agnanayon a panagdur-as ken kinaan-anay. Ti plano ti kinaragsak, a naawagan pay iti plano ti pannakaisalakan, ket plano a nabuangay para kadagiti pamilia. . . .

“ . . . Daytoy daydi doktrina ni Cristo. . . . No awan ti pamilia, awan met ti plano; awan iti rason para iti mortal a biag.”<sup>4</sup>

#### **DAGITI NAGADAWAN**

1. Carole M. Stephens, “The Family Is of God,” *Liahona*, Mayo 2015, 11, 13.
2. L. Tom Perry, “Why Marriage and Family Matter-Everywhere in the World,” *Liahona*, Mayo 2015, 41.
3. Bonnie L. Oscarson, “Defenders of the Family Proclamation,” *Liahona*, Mayo 2015, 15.
4. Julie B Beck, “Teaching the Doctrine of the Family,” *Liahona*, Mar. 2011, 32, 34.

### **Ibilang Daytoy**

Apay a ti pamilia, ket isut kapatgan a yunit ita a panawen ken iti kinaagnanayon?